

PEDI – “Peace”

KHUTŠO^v



“O ka be o lemoga le wena ka lona letsatsi le tše di go išago khutšong, fela bjalo di utagaletše mahlo a gago!” Luka 19:42.

Ge re lebelela 'me re bona tše di diregago lefaseng mehleng yeno, go bonala gabotse gore khutšo ga e gona lefaseng. Mo gohle re kwa

tša lehloyo, tša go lwa, dipolao, dintwa le mekgoši ya dintwa. O ka no phutholla koranta efe le efe, o tlo hwetša diilo tše di šiisago tše batho ba diranago tšona ka baka la sebe, lehloyo le mona. Banna ba ba phagamego ba lefase ba lekile mengwaga ye mentiši go tlišetša lefase khutšo, eupja ba paletšwe. Ga se lefase fela le le tšwenyega-go gakaakaa. Go nyamiša ka gobane le malapa a mantši a rena le ona ga a na khutšo. Taba e mpe gagolo-golo, ke ge batho ba bantši kudu lefaseng ba se na khutšo meoyeng ya bona, 'me modu wa mpherepere ka moka o gona mo.

KE KA BAKA LANG GO SE NA KHUTŠO?

Mathomong Modimo o hlōdile lefase gammogo le bjang, maloba, dihlare le diphoofolo tšohle tše di phelago meetsing le tše di phela go nageng. Modimo o hlodile le bona Adama le Efa gomme tlholong ka moka go be go na le khutšo. Adama le Efa ba be ba sa boife diphoofolo, le diphoofolo seng sa tšona di be di dula di thabile, di na le kutšo. Nku e kgonne go sepela kgaufsi le tau, 'me tau e se e dire selo. Godimo ga tšohle gobe go na le khutšo gare ga Modimo le motho, gomme Modimo o be a fela a theoga ka mantšibua a sepela le Adama le Efa a boledišana le bona. Go be go se na poifo dipelong tša bona go tšhaba Modimo, ba hlogetše go mmona ge a tla go kopana le bona. Ke mo Satane, lenaba la khutšo, a tsenego nogeng a leka Efa le Adama go ba diriša sebe, ka gobane mo sebe se lego gona, khutšo ga e go. Satane, tate go maaka, a ba botša a re; ba ka se hwe ge ba ka leesa go theeletša Modimo a ba ganeditšego a ba botša a re: Le ka se ke la di ja. Bjaloka batho ba bantši ba lehono, ba ba theeletšago lentšu la Satane, Adama le Efa le bona ba dira se Satane a ba laetšago sona, ba senya pele ga Modimo. Ka yona našo ye, khutšo ye ba bego ba na le yona, ya ba tlogela. Botse le khutšo kamoka tše Modimo a di dirilego, tša senywa ka sebe se tee 'me poifo ya tsena dipelong tša Adama le Efa. Ka mantšibua ge Modimo a etla go bolela le bona ba utama ba tšhaba sefahlogo sa Modimo. "Ke gona, sebe se tsene lefaseng ka motho o tee", le rena ba re phelago lehono re dirile dibe kamoka, re hlaelelwa ke letago la Modimo. (Ba-Roma 5:12 & 2:33). Sebe se iša dibeng tše dingwe, 'me bjale lefase lohle le lwatšwa ke sebe. Ka fao, khutšo ga e buše lefaseng.

MODIMO O RATILE GO BUŠETSA KHUTŠO LEFASENG.

Modimo a le kwa lehodimong a lebelela a bona lehloyo, poifo, sebe le manyami. Ke lerato le legolo la gagwe a roma Morwa wa gagwe e a tswetšwego a nnoši a tswalwe lešakeng. Mongwaga o mongwe le o mongwe ka nako ya Matswalo a Morena re gopotšwa mantšu a Morongwa: "Se boifeng, gobane bonang, ke le botša taba e botse ya thabo e kgolo ye e tlogo ba ya setšhaba ka moka. Gobane lehono le tswaletswe Mophološi e lego Kriste Morena mo motseng wa Dafida. Taetšo go lena še: Le tla hwetša leseša le le phuthetšwego ka mašela le letše legopong. A sa realo ke ge lešaba la

dira tša legodimo le eme le yena Morongwa reta Modimo le re: Tumišo a e ye go Modimo magodimodimong, lefaseng go be le khutšo, kgahlišo bathong.” (Luka 2:10:14). Jesu o rometšwe lefaseng go “bonegela ba go dula lefsifsing le moriting wa lehu, me a go sokollela maoto a rena tseleng ya khutšo”. (Luka 1:79). Puku ya Ba-Efeso 2:14 e re botša e re: “Gobane yena ke khutšo ya rena.” Modimo o rometše kgoši ya kagišo (khutšo) lefaseng, me ge batho mehleng yela ba ka be ba amogetše yona kgoši ya kagišo, ba be ba tlo ba ba phela ka kwano gape.

BATHO BA DIRILENG KA KHUTŠO YE?

Batho ba mehla yela, Bayuta le Baditšhaba ba swana le Adama le Efa, ba kgetha go lesa go kwa Modimo ba latela keletšo ya Satane. Ba galala kgoši ya kagišo. Mola Pilato a bea Jesu le Baraba pele ga bona ba goelela: “Tloša Jesu! Re fe Baraba!” Ka mantšu a mangwe ba ile ba re: Tloša kagišo o re fe lehloyo, dintwa, polao le sebe. Batho bao ba fiwa maatla a go ikgethela yo ba mo nyakago, ba sa gapeletšwe, me ba kgetha Baraba. Mehleng ya rena go no swana. Modimo o re file go kgetha. Re ka amogela Jesu a be Mophološi le kgoši ya rena. O tlo tlišetša bophelo bja rena khutšo. O re botša a re: “Ke le tlogelela khutšo, ke le fa khutšo ya ka. Ga ke le nee ka mo lefase le neago ka gona.” (Johane 14:27). Dibe tša rena di re išitše kgole le Modimo 'me ka fao ga re na khutšo seng sa rena. Eupja Jesu o fela o eme a re letetše ka matsogo a a otlollotšego go re amogela. O nyaka go re hlatswa ka madi a gagwe a bohlokwa le go re fa maatla a go ba bana ba Modimo 'me go re fa khutšo.

Re botšwa mo go Ba-Roma 5:1. “Bjale, ge re lokafaditšwe ka tumelo, ke gona ge re boelantšwe le Modimo ke mong wa rena Jesu Kriste.” Mono lefaseng ga go na selo se se kago re nea khutšo. Tšhelete, mahumo goba tumo di paletšwe; bjalwa bo ka se go fe yona, le ge e le ka go bea leina la gago pukung ya kereke o ka se e hwetše. Tsela ga go khumana khutšo ke e tee fela, ke go tla go Morena Jesu, go ipolela dibe tša rena re sokologa. Ke mo yena o botega o lokile, o re rebalela dibe a re hlatswa bokgopo kamoka. Khutšo ye Jesu a re fago yona “e feta tlišaologanyo.” (Ba-Filipi 4:7). Ka mantšu ga re kgone go hlalosa se khutšo e lego sona, eupja re ka e hwetša bophelong bja rena ga re tlogela menate ya lefase, ra tlogela sebe le bagwera ba ba ratago sebe, ra ineela go Jesu go direla yena a nnoši. Re ka phela lefaseng re se na khutšo, eupja go hwa re se na yona go tlo re thatafela. Gobane mmušo wa Modimo ga se go ja le go nwa, ke toko le khutšo le thabo ka Moya-mokgethwa. (Ba-Roma 14:17). Ge re hloka khutšo ya Modimo dipelong tša rena re ka se a mogelwe lehodimong la gagwe la khutšo. Ge re sa ka ra amogela Kgoši ya kagišo bophelong bja rena, gomme re hwa re le dibeng, re tlo ya mollong wo o sa felego wa dihele. Go hwa o le bjalo go tlo go thatafela, ka gobane o tlo ba

yo a lahlegilego go iša go sa felego, 'me Lentšū la Modimo le re: "Muši wa tlhokofatšo ya gago o tlo rotoga go iša mehleng ya neng le neng." Modira-dibe o ya diheleng tše di sa felego, gomme rena kamoka re dirile dibe. Ga go e a dirago tše botše, le ge e le o tee. Ka fao ge o nyaka go ya lehodimong, se o swanetšego go se dira se-se. Boelantšwa le Modimo, o hwetše khutšo ya gagwe pelong ya gago. "Mo dipelong tša lena go buše khutše ya Modimo." (Ba-Kolose 3:15).

Ka nako ya matswalo a Morena re gopotšwa go tla ga Jesu lefaseng go tliša khutšo. Ka nako ya Lehu la Morena re gopotšwa ka mo batho ba mo gannego, ba mmapola. Mogwera e a rategang, a o tlo ba yo a ganago mong wa gago, goba yo a mo amogelago bophelong bja gago na? Go na le tsela e tee fela ya go hwetša khutšo. Khunamela Modimo, o ipolele gore o modira-dibe. Mo kgopele go go hlatswa ka madi a gagwe a bohlokwa a go dire wa gagwe. Megopolong ya gago o ka re o lokile, eupja o swanetše go phološwa. O re o yo mobe kudu, eupja Jesu a ka se ke a go lelekela ntle, o sa rata go go amogela. Ge o s'ešo wa ba le khutšo ya Modimo pelong ya gago, e amogela bjale gomme o tlo ba le lethabo le le palago go bolelwa le le nago le letago. Phutšegong enngwe mokgalabje a ema a re: Nna ke be ke le gona dipušong tša dikgoši tše nne. Pušong ya mathomo re be re fela re na le dintwa. E be e le nako ye e šišago. Pušong ya bobedi ra tlelwa ke tlala ye kgolo, ra ja magotlo le bjanyi. Pušong ya boraro manaba a rena a re fenya, ra ba bahlanka ba ona. Eupja ka nako ya yona kgoši ya boraro ra etelwa ke kgoši yennngwe, kgoši ye kgolo yo botho, kgoši ya khutšo, kgoši ya lerato — Jesu, Morena wa lehodimo. Ke yena e a nago le phenyo bjale. O fentše dipelo tša rena, ka fao re na le khutšo le mohora, gomme re holofetše go tlo dula le yena lehodimong.

Mogwera e a rategang, gafela bophelo bja gago go Jesu. Ka bjako, ema tseleng ye e go išago diheleng, retologa (sokologa) o direle Kgoši ya dikgosi, Morena wa marena. Ka nako enngwe bagwera ba gago ba ka go tlogela, fela gopola lentšū la Jesu le le rego: "Ke na le lena ka mehla go fihla bofelong bja lefase."

Gomme mafelelong: "Mo dipelong tša lena go buše khutšo ya Modimo." (Ba-Kolose 3:15).

For free Gospel literature, books and tracts in over 540 languages, write to:

E-MAIL: info@angp.co.za

ALL NATIONS GOSPEL PUBLISHERS

P.O. Box 2191, PRETORIA, 0001, R.S.A.

(A Gospel Literature Mission financed by donations)

(Reg. No. 1961/001798/08)